

Ta temporada di Kenepa y bo tin di sabori'e pero cu cuidao

ORANJESTAD (AAN): Ken no ta gusta savoria un dushi Kenepa. Awendia te hasta un cancion nos musico y areglistanan local a produci den temporada di carnaval cu titula "Kenepa" Un fruta masha popular y gusta pa mucha y hende grandi pero na mesun momento e por ta peligroso tambe.

Ta su temporada cu e mata ta duna fruta. Kisas awo cu awa ta yobiendo den e ultimo simannan aki e mata por bay duna hopi mas fruta. Den caso cubo tin matanan grandi, ta mas ainda lo bo cosecha.

Un mata di Kenepa kisas no mester di mucho cuidao. Esaki mas tanto ora un mata

ta chikito claro e mester un bon cuidao pa e por sigui desaroya den bon estado y sigur un mata sano.

Mata di Kenepa por crece na un altura di 25 meter. Blachinan poco largo cu por yega te na 12 centimeter y un habchura di 5 cm. Su fruta ta berde parti pafu cu un casca manera poco duro

te cu moli tin biaha.

Por haye tambe sea e casca ta fini y algun tin casca diki. Tin dinan ta di e forma rondo y tin biaha manera oval. Un diameter di entre 2-3cm. Na momento cubo habri esaki cual ta den forma di "morde habri'e y kibre. Asina bo ta yega na e fruta parti paden.

Su colorman ta geel cam-



bia pa color manera oranje of color salmon cu e fruta rond di e simiya cu ta duro di color blanco. Den caso cubo come hopi Kenepa eta haci bo gargata manera dolor y bo lenga tambe. E sabor por ta dushi y por ta hopi pa zuur tambe tin biaha. Un mata di Kenepa por bira hopi grandi. Tene cuenta tambe debi na su grandura cu e por bira den transcurso di añanan e por ta un problema. Ta consehabel pa no plante mucho cerca di cas of di muraya. Esaki por trece problema pabo den futuro.

No por descarta cu e ta duna un bon sombra hopi bon pa un picknick of sinta un rato tuma poco aire fresco ta simpelmente perfecto.

Awendia cu den e tempo moderno aki esnan cu tin e mata di Kenepa ta worde traha na juice tambe. Sigur un bebida hopi refrescante y sabroso. E mayoria ta come fresco piki for di e mata. Hende grnadi y mucha ta encantada e Kenepa aki. Na momento cubo sa di un mata di Kenepa cu ta dunando fruta tur hende ta rond di e mata pa por alcanza y piki mas tanto Kenepa posibel. Semper nos ta conseha no laga muchanan pa nan cuenta ta piki Kenepa.

Muchanan por ta hungando rond comiendo Kenepa y e mucha por "pega" cune. Den caso cu algo asina mester tuma lugar e mayor mester actua hopi liher. Ta consehabel pa pone e mucha den bo scochi bocabou riba bo piananden y cubo man parcialmente sera. Cubo plant'i man dale parti ariba den su lomba pa e por saca e simiya di Kenepa cu a keda pega den su garganta. Pesey un biaha mas nos ta haci un apelacion pa no laga e muchanan so piki Kenepa, semper esaki mester tuma lugar bou di supervision di mayornan.

Den caso cubo ta desea un mata di Kenepa e ta obtenibel na Santa Rosa. "Temporada di kenepa, sabori'e pero cu cuidao".